

**S A M Þ Y K K T****um stjórn Húsavíkurkaupstaðar.****I. KAFLI****Skipan og verkefni bæjarstjórnar.****1. gr.**

Bæjarstjórn Húsavíkur er skipuð 9 bæjarfulltrúum, kjörnum samkv. lögum nr. 58/1961.

**2. gr.**

Bæjarstjórn Húsavíkur er almennt í fyrirsvari fyrir kaupstaðinn og ber henni að gæta hagsmuna hans í hvívetna. Meginverkefni bæjarstjórnarinnar eru þessi:

**A. Hún fer með yfirstjórn á fjárreiðum kaupstaðarins.**

1. Fyrir lok desembermánaðar ár hvert ber bæjarstjórn að gera áætlanir um tekjur og gjöld kaupstaðarins fyrir næsta reikningsár (almanaksár). Í fjárhagsáætlun skal greina í meginatriðum, hvernig fjárveitingu til einstakra stofnana og framkvæmda skuli hagað, sbr. B-lið, enn fremur skal þar tekið fram hvernig áætlaðar tekjur greinast.
2. Hún hefur yfirumsjón með fjárstjórn kaupstaðarins, og gætir þess að tekjur séu innheimtar og greiðslur inntar af hendi í samræmi við það, sem ákveðið er í fjárhagsáætlun.
3. Hún hefur yfirumsjón með því, að eignir kaupstaðarins séu tryggilega varðveittar.
4. Hún kveður á um lántökur fyrir kaupstaðinn, þó er bæjarstjóra heimilt að taka stutt rekstrarlán, án sérstakrar samþykktar bæjarstjórnar.
5. Hún kveður á um ábyrgðir bæjarsjóðs. Heimilt er þó bæjarráði að taka fullnaðarákvörðun um ábyrgð bæjarsjóðs, sé ekki um meiri háttar fjárhæð að ræða og ábyrgð bæjarsjóðs er nægilega tryggð með öruggri baktryggingu.
6. Hún skal hafa lagt fullnaðarúrskurð á ársreikninga kaupstaðarins eigi síðar en í júlímánuði ár hvert.

**B. Hún hefur yfirstjórn verklegra framkvæmda kaupstaðarins. Í fjárhagsáætlun kveður hún á um hvernig verklegum framkvæmdum skuli hagað í meginatriðum á fjárhagsárinu. Hún getur gert heildaráætlanir um framkvæmd tiltekinna verkefna, er taka yfir lengri tíma, svo og um einstök verk, eftir því sem ástæða þykir til.****C. Hún kýs bæjarstjóra, bæjarráð og aðrar nefndir eftir því sem segir í samþykkt þessari eða í öðrum samþykktum segir, svo og endurskoðendur reikninga kaupstaðarins. Enn fremur kýs bæjarstjórn fulltrúa kaupstaðarins á fundi samtaka sveitarfélaga, sem kaupstaðurinn er aðili að, svo og fulltrúa er kaupstaðnum kann að vera skylt að tilnefna skv. lögum.**

Hún ræður fasta starfsmenn kaupstaðarins. Ákveður laun þeirra, sbr. 58. grein.

**D. Hún setur reglur og reglugerðir um stjórn kaupstaðarins og fyrirtækja hans eftir því, sem við á og þurfa þykir.**

Bæjarstjórn ákveður gjaldskrár fyrirtækja kaupstaðarins eftir því sem þörf krefur.

## II. KAFLI

## Fundarsköp bæjarstjórnar.

## 3. gr.

Á fundi bæjarstjórnar í júnimánuði ár hvert, skal bæjarstjórn kjósa sér forseta, svo og 1. og 2. varaforseta úr hópi bæjarfulltrúa til eins árs. Sá er rétt kjörinn forseti, sem fengið hefur atkvæði meira en helmingis bæjarfulltrúa. Verði þeim atkvæðafjölda ekki náð, skal kjósa að nýju, og skal þá kjósa um þá tvo, sem flest fengu atkvæðin. Ef þrír eða fleiri, sem um skyldi kjósa, hafa fengið jafn mörg atkvæði, skal varpa hlutkesti um hverja tvo skuli kjósa. Verður sá rétt kjörin, sem fleiri atkvæði fær, þó að hann fái ekki helming atkvæða. Verða atkvæði jöfn ræður hlutkesti.

Aldursforseti gegnir forsetastörfum, unz kosinn hefur verið forseti.

Ef enginn forseta er viðstaddur á fundi bæjarstjórnar, gegnir aldursforseti forsetastörfum, nema bæjarstjórn ákveði að kjósa sérstakan fundarstjóra í það skipti. Ef forseti deyr eða varaforseti eða verður varanlega forfallaður frá störfum í bæjarstjórn, áður en kjörtími hans er á enda, skal kjósa forseta í hans stað fyrir þann tíma sem eftir er kjörtímans.

## 4. gr.

Forseti bæjarstjórnar stýrir umræðum á fundum hennar. Hann sér um, að fundargerðir séu skipulega færðar í gerðabók og allar ályktanir séu rétt og nákvæmlega bókaðar. Forseti sér um að allt fari löglega og skipulega fram á fundum bæjarstjórnarinnar. Hann úrskurðar um skilning á fundarskópum skv. samþykkt þessari, en skjóta má úrskurði hans til bæjarstjórnarinnar, er sker þá úr.

## 5. gr.

Bæjarstjórn kýs tvo skrifara úr hópi bæjarfulltrúa á þeim fundi bæjarstjórnar, er forsetakjör fer fram. Kjörtími skrifara og varaskrifara er sami og forseta. Komi ósk fram um að skrifararnir skuli kosnir hlutfallskosningu, er forseta skylt að verða við henni.

## 6. gr.

Bæjarstjórn ræður sérstakan fundarritara utan bæjarstjórnar, sem sér um færslu gerðabókar og hafa skrifarar í samráði við forseta eftirlit með því, að rétt sé fært til bókar. Bæjarstjórn ákveður þóknun til fundarritara.

Í gerðabók skal þess getið hvar og hvenær fundur er haldinn, og hverjir sitji fundinn. Fundargerð hvers fundar skal lesa upp úr gerðabók í fundarlok og skulu allir viðstaddir bæjarfulltrúar undirrita hana. Hver bæjarfulltrúi, sem eigi er samdóma hinum á rétt á því, að ágreiningsálit hans sé ritað með fáum orðum í gerðabókina.

## 7. gr.

Bæjarstjórn heldur að jafnaði reglulegan fund einu sinni í mánuði og getur bæjarstjórn, ef hún telur ástæðu til, ákveðið fasta fundardaga. Heimilt er bæjarstjóra að fengnu samþykki bæjarráðs að fella niður fundi í júlí og ágústmánuðum. Bæjarstjóri boðar fundi bæjarstjórnar. Aukafundi skal halda skv. ákvörðun bæjarstjóra. Nú kemur fram ósk frá forseta bæjarstjórnar eða minnst þrem bæjarfulltrúum að bæjarstjórnin sé kvödd saman til aukafundar, og er þá bæjarstjóra skylt að verða við henni.

## 8. gr.

Bæjarstjóri semur dagskrá bæjarstjórnarfunda.

Á dagskrá skal setja:

1. Fundargerðir bæjarráðs og annarra lögmaeltra nefnda, sem þurfa staðfestingar bæjarstjórnar á ályktunum sínum.

2. Hvert það mál, sem fellur undir verksvið bæjarstjórnar skv. 2. mgr. og sbr. 10 gr. laga nr. 58/1961, enda sé þess óskað af bæjarstjóra, bæjarráði, lögmælti nefnd eða bæjarfulltrúa að málið sé á dagskrá tekið.
3. Kosningar nefnda og starfsmanna, svo og hvert það málefni annað, sem bæjarstjórn á um að fjalla að lögum.

Sá, sem óskar að fá mál tekið á dagskrá bæjarstjórnar, skal tilkynna það bæjarstjóra skriflega eigi síðar en tveim sólarhringum fyrir fund. Heimilt er þá bæjarstjóra að verða við ósk um að mál sé tekið á dagskrá, þótt síðar berist, enda hafi ósk um það borizt áður en dagskrá er send bæjarfulltrúum.

Nú óskar þegn bæjarfélagsins, sem er utan bæjarstjórnar, að erindi frá honum sé tekið á dagskrá bæjarstjórnar, og skal þá bæjarstjóri vísa því til bæjarráðs eða þeirrar nefndar, sem það vegna efnis frekast heyrir undir og skal það tekið á dagskrá bæjarstjórnar, sem liður í fundargerð bæjarráðs eða nefndarinnar, nema erindið sé afgreitt með fullnaðarákvörðun bæjarráðs. Bæjarstjóri skal í síðasta lagi einum sólarhring fyrir bæjarstjórnarfund hafa sent bæjarfulltrúum dagskrá fundararins, þó er heimilt að stytta þennan frest, ef boðað er til aukafundar um málefni, sem meiri hluti bæjarfulltrúa óskar eftir að tekið sé á dagskrá. Í dagskrá skal tilgreina fundarstað og tíma, þær fundargerðir, sem fyrir fundi liggja, tillögur, sem fram hafa komið og gera í stuttu máli grein fyrir þeim málum öðrum, sem um skal fjallað.

Bæjarstjórn getur ákveðið að fylgja skuli eftirrit fundargerða og tillagna með dagskrá. Mál skulu að jafnaði afgreidd í þeirri röð, sem dagskrá segir, þó er forseta heimilt að víkja frá röð mála á dagskrá, enda fallist bæjarstjórn á breytinguna.

Heimilt er forseta að taka mál á dagskrá, þótt ekki sé þess getið í fundarboði, séu afbrigði veitt, með samþykki  $\frac{2}{3}$  viðstaddra bæjarfulltrúa og bæjarstjóra.

#### 9. gr.

Auglýsa skal venjulega fundi bæjarstjórnarinnar með a. m. k. 12 stunda fyrirvara á sama hátt og venja er að birta opinberar tilkynnnigar í Húsavík. Greina skal í fundarauglýsingu efni dagskrár í höfuðdráttum.

#### 10. gr.

Bæjarstjórnarfundi skal halda í heyranda hljóði. Bæjarstjórn getur þó ákveðið að ræða einstök mál fyrir luktum dyrum, t. d. einkamál manna eða málefni, sem æskilegt er vegna hagsmuna kaupstaðarins, að rædd séu fyrir luktum dyrum. Komi tillaga fram um það, að mál skuli rætt fyrir luktum dyrum, skal hún afgreidd án umræðna.

Óheimilt er að skýra frá því, sem fram kemur við umræður fyrir luktum dyrum. Raski áheyrandi fundarfríði á bæjarstjórnarfundi, getur forseti látið vísa honum úr fundarsal.

#### 11. gr.

Bæjarstjórn getur enga ályktun gert, nema meira en helmingur bæjarfulltrúa sé á fundi. Afl atkvæða ræður úrslitum mála.

Bæjarstjóri og hver bæjarfulltrúi getur horið fram breytingartillögu við hvert það mál, sem til umræðu er, og bæjarstjórn á úrskurðarvald um, þó skulu breytingartillögur við afgreiðslu mála, sem samkvæmt þessum samþykktum þarf tvær umræður um, hafa verið tilgreindar í dagskrá og afhentar bæjarstjóra skriflega, sem um sérstaka tillögu væri að ræða, sbr. 8. grein. Þó er heimilt að veita afbrigði í þessum efnum með meiri hluta atkvæða. Ef jafnmörg atkvæði eru með máli og móti fellur það, nema við kosningar, þá ræður hlutkesti. Mál má afgreiða með því að samþykkja það eða fella, vísa því frá með rökstuddri dagskrá, vísa því til afgreiðslu

bæjarstjóra eða nefndar eða með því að fresta því. Forseti ákveður hvernig atkvæðagreiðslum um tillögur skuli hagað.

## 12. gr.

Bæjarstjórn afgreiðir mál við eina umræðu, nema fjárhagsáætlun kaupstaðarins og fyrirtækja hans, ársreikninga, svo og reglugerðir, sem hljóta skulu staðfestingu ráðherra. Um þessi mál skulu fara fram tvær umræður og líða ein vika hið skemmsta á milli umræðna.

## 13. gr.

Atkvæðagreiðsla fer fram þannig, að bæjarfulltrúi réttir upp hægri hönd. Nafnakall skal við hafa, ef forseti ákveður, bæjarstjóri óskar eða tveir bæjarfulltrúar hið fæsta.

Við nafnakall greiða bæjarfulltrúar atkvæði eftir skrá um bæjarfulltrúa í stafrófsröð. Nöfnum varafulltrúa skal bæta inn í skrána í rétttri stafrófsröð í stað nafna þeirra, sem fjarstaddir eru.

Hlutkesti ræður á hverjum byrja skal. Við nafnakall er bæjarfulltrúa skylt að greiða atkvæði, nema hann færi rök fyrir undanfærslu sinni, er forseti metur gild.

Ef bæjarfulltrúi vill ekki una úrskurði forseta, má hann skjóta úrskurðinum til bæjarstjórnar, sem sker úr án umræðna.

## 14. gr.

Hver bæjarfulltrúi, sem taka vill til máls, skal óska heimildar forseta. Að jafnaði skulu menn taka til máls í þeirri röð, sem þeir hafa kvatt sér hljóðs. Heimilt er að vika frá þessu, ef um er að ræða bæjarstjóra eða framsögumann svo og bæjarfulltrúa, sem vill gera stutta athugasemd eða leiðrétta ummæli um sjálfan hann. Ef tveir eða fleiri kveðja sér samtímis hljóðs, ákveður forseti í hvaða röð þeir tala. Bæjarfulltrúi skal standa við sæti sitt, þegar hann talar, nema forseti leyfi annað. Bæjarstjórn getur heimilað, að maður utan bæjarstjórnar megi tala á bæjarstjórnarfundum, en skylt er honum þá að gæta í hvívetna fundarskapa.

## 15. gr.

Flutningsmaður tillögu má tala þrisvar við hverja umræðu máls, en aðrir bæjarfulltrúar tvisvar. Bæjarfulltrúa er þó heimilt að taka oftar til máls til þess að bera af síkja frá þessu, ef um er að ræða athugasemd við fundarskóp. Ef bæjarfulltrúi vill beina fyrirspurn til bæjarstjóra um málefni, sem ekki er á dagskrá, skal hann að jafnaði hafa hana skriflega og afhenda með sama fyrirvara og um tillögu sé að ræða, þó er forseta heimilt að leyfa, að fyrirspurn sé borin fram á fundi, enda samþykki bæjarstjóri afbrigðin.

## 16. gr.

Bæjarfulltrúi skal beina máli sínu til forseta.

Ef bæjarfulltrúi tekur til máls við afgreiðslu á fundargerð nefndar, skal hann taka fram, hvaða lið eða liði fundargerðar hann óskar að ræða og má ekki ræða nema eitt mál í einu. Ekki má lesa upp prentað mál nema forseti leyfi.

## 17. gr.

Ef forseti telur umræður dragast úr hófi fram, getur hann lagt til, að ræðutími hvers fulltrúa megi ekki fara fram úr ákveðinni tímallengd eða umræðu sé hætt. Þá getur forseti, hvenær sem er, lagt til, að umræðu skuli lokið á ákveðnum tíma. Ekki má þó takmarka umræðu svo, að hún standi skemur um dagskrármál en tvo tíma, meðan nokkur bæjarfulltrúi kveður sér hljóðs.

Bæjarstjórn afgreiðir tillögur forseta skv. 1. mgr. umræðulaust. Tveir fulltrúar hið fæsta geta einnig borið fram slíkar tillögur, og skulu þær líka afgreiddar umræðulaust.

Ákvæði um takmörkun ræðutíma eiga ekki við, þegar fjallað er um frumvarp að fjárhagsáætlun.

#### 18. gr.

Skylt er bæjarfulltrúum að lúta valdi forseta í hvívetna, er að því lýtur, að gætt sé góðrar reglu. Ef bæjarfulltrúi ber aðra menn brigzlum eða vikur verulega frá umræðuefninu, skal forseti víta hann.

Ef bæjarfulltrúi er vittur tvisvar á sama fundi, getur forseti lagt til við bæjarstjórn, að hann verði sviptur málfrelsi á þeim fundi. Skal sú tillaga afgreidd umræðulaust. Ef bæjarfulltrúi hlýðnast ekki úrskurði bæjarstjórnar eða almenn óregla kemur upp á fundi, skal forseti gera hlé á fundi um stundarsakir eða, ef nauðsyn krefur, slíta fundi.

### III. KAFLI

#### Réttindi og skyldur bæjarfulltrúa.

#### 19. gr.

Hverjum bæjarfulltrúa er skylt að taka að sér störf, sem bæjarstjórn felur honum, t. d. forsetastörf, setu í bæjarráði eða öðrum nefndum, skrifarastörf o. s. frv.

Sá er verið hefur forseti bæjarstjórnar, setið í bæjarráði eða fastanefnd, getur þó skorazt undan kosningu, jafnlangan tíma og hann hefur haft starfið á hendi.

#### 20. gr.

Bæjarfulltrúum er heimilt að kynna sér skjöl kaupstaðarins.

#### 21. gr.

Hver bæjarfulltrúi á rétt á þóknun fyrir störf sín í bæjarstjórn og nefndum bæjarstjórnar. Bæjarstjórn ákveður á fundi sínum í desembermánuði, hver þóknunin skuli vera næsta reikningsár fyrir störf í bæjarstjórn og nefndum kaupstaðarins.

#### 22. gr.

Ef bæjarfulltrúi, kosinn í nefnd eða til annarra starfa, forfallast um stundarsakir, vegna veikinda eða af öðrum ástæðum, á hann rétt á að tilnefna mann af sama lista og hann var kjörinn, til þess að taka sæti hans á meðan, enda hafi varafulltrúi ekki verið kjörinn. Hafi hann engan tilgreint, fer um varamann skv. 2. og 3. mgr. 20. gr. sveitarstjórnarlaga.

### IV. KAFLI

#### Bæjarráð.

#### 23. gr.

Á fundi bæjarstjórnar í júnímánuði ár hvert skulu kosnir hlutfallskosningu þrjú bæjarfulltrúar í bæjarráð og jafnmargir til vara, þó mega varamenn vera úr hópi fyrstu varabæjarfulltrúa. Kosning bæjarráðs gildir unz nýtt bæjarráð hefur verið kosið. Bæjarráð kys sér formann og ritara. Kjósa má bæjarstjóra formann, þó hann sé ekki kjörinn í ráðið.

Bæjarráð heldur að jafnaði fundi vikulega, þó má fella niður fundi í fjarveru og forföllum bæjarstjóra. Heimilt er bæjarráði að fækka fundum sínum í júlí- og ágústmánuðum. Kveðja skal bæjarráð saman til aukafundar, ef bæjarstjóri telur

ástæðu til og fyrir tilmæli bæjarráðsmanns. Bæjarstjóri undirbýr dagskrá bæjarráðsfunda og sér um að fundarboð sé tilkynnt bæjarráðsmönnum eigi síðar en með þriggja stunda fyrirvara. Formaður sér um að allt fari löglega og skipulega fram á fundum og úrskurðar ágreiningsmál út af fundarskópum.

Í gerðabók skal greint frá því, hvar fundurinn sé haldinn og hvenær og hverjir sitji fundinn. Þar skal greint frá dagskrármálum og efni þeirra í stuttu máli, svo og hverja afgreiðslu þau fá. Um fundarsköp bæjarráðs fer eftir sömu reglum og gilda um bæjarstjórn eftir því, sem þær geta átt við.

#### 24. gr.

Bæjarráð fer ásamt bæjarstjóra með framkvæmdastjórn málefna Húsavíkurkaupstaðar að því leyti, sem hún er ekki öðrum fengin skv. lögum, reglugerðum eða sérstökum samþykktum bæjarstjórnar. Bæjarráð tekur fullnaðarákvörðun um þau mál, sem til þess koma, nema um veruleg fjárhagsatriði sé að ræða eða málefni, þar sem ákvörðun bæjarstjórnar er sérstaklega áskilin að lögum. Fundargerðir og tillögur nefnda bæjarstjórnar skulu lagðar fyrir bæjarráð til athugunar.

Ekki getur bæjarráð tekið fullnaðarákvörðun um mál, ef bæjarráðsmaður eða bæjarstjóri óskar, að bæjarstjórn taki fullnaðarákvörðun um það, nema sé um að ræða mál, sem bæjarstjórnin hefur vísað til fullnaðarafgreiðslu hjá bæjarráði.

#### 25. gr.

Bæjarráð hefur eftirlit með fjárstjórn kaupstaðarins. Það undirbýr árlega fjárhagsáætlun og sér um að ársreikningar séu samdir. Enn fremur hefur það eftirlit, ásamt bæjarstjórn með verklegum framkvæmdum, fasteignum og fyrirtækjum kaupstaðarins, nema öðrum sé það falið skv. lögum, reglugerðum eða samþykktum bæjarstjórnar. Bæjarráð annast málefni vatnsveitu, holræsamál, skipulagsmál, þó ekki skipulagsuppdrætti, sbr. 28. gr., brunamál, fjallskilamál, og öll önnur mál, sem ekki eru falin sérstökum nefndum í samþykkt þessari eða öðrum með sérstökum ályktunum bæjarstjórnar. Auk þess getur bæjarstjórn falið bæjarráði að annast einstök mál, sem heyra undir aðrar nefndir bæjarstjórnar, nema lög og reglugerðir kveði á um annað.

#### 26. gr.

Skýlt er starfsmönnum bæjarins að sitja fundi bæjarráðs, þegar til umræðu eru málefni, sem störf þeirra snerta og þess er óskað af bæjarstjóra eða bæjarráði.

### V. KAFLI

#### Lögmæltar fastanefndir bæjarstjórnar.

#### 27. gr.

Bæjarstjórn kýs hlutfallskosningu á fundi innan fjögurra vikna frá bæjarstjórnarkosningum eftirtaldar lögmæltar fastanefndir bæjarstjórnar:

Bygginganefnd, hafnarnefnd, rafveitunefnd, heilbrigðisnefnd, framfærslunefnd og fræðsluráð.

Kjörtími er sami og bæjarstjórnar. Nefndarmenn eiga rétt á þóknun fyrir störf sín skv. ákvæðum 21. gr.

#### 28. gr.

Bygginganefnd skipa, auk bæjarstjóra, fjórir menn kosnir af bæjarstjórn. Bæjarstjóri er sjálfkjörinn formaður skv. lögum. Tveir nefndarmenn skulu kosnir úr hópi bæjarfulltrúa, og jafnmargir til vara.

Varamenn mega vera úr hópi varabæjarfulltrúa. Þá kýs bæjarstjórn tvo nefndarmenn úr hópi annarra en bæjarfulltrúa og jafnmarga til vara. Bygginganefnd annast

stjórn byggingarmála Húsavíkurkaupstaðar skv. fyrirmælum í lögum og byggingasamþykkt og sér um að henni sé fylgt og að byggt sé í samræmi við skipulag. Bygginganefnd úrskurðar uppdrætti, veitir löggildingar, fjallar um skipulagsuppdrætti, ákveður nöfn gatna, svo og tölusetningar húsa, svo og umferðarmál. Byggingafulltrúi setur fundi nefndarinnar með tillögurétt og málfrelsi. Hann undirbýr dagskrá funda í samráði við formann. Byggingafulltrúi er ekki kjörgengur í bygginganefnd. Bygginganefnd kýs fundarritara úr hópi nefndarmanna. Afl atkvæða ræður úrslitum mála, nema atkvæði séu jöfn, þá sker úr atkvæði formanns, enda taki hann þátt í atkvæðagreiðslunni.

#### 29. gr.

Hafnarnefnd skipa fimm menn og jafnmargir til vara. Bæjarstjóri er formaður nefndarinnar. Hafnarvörður skal jafnan sitja fundi nefndarinnar með tillögurétti og málfrelsi. Hafnarnefnd hefur á hendi umsjón með framkvæmd hafnarmála, svo sem nánar kveður á um í hafnarlögum, hafnarreglugerð og samþykktum þessum. Fundarsköp bæjarráðs gilda á fundum hafnarnefndar svo sem við á. Hafnarnefnd kýs sér fundarritara úr hópi nefndarmanna.

#### 30. gr.

Rafveitunefnd skal skipuð þrem mönnum og jafnmörgum til vara. Bæjarstjóri er formaður rafveitunefndar, þótt hann sé ekki kjörinn nefndarmaður. Rafveitustjóri skal sitja fundi nefndarinnar með tillögurétti og málfrelsi. Rafveitunefnd annast yfirumsjón með rekstri Rafveitu Húsavíkur og fjárreiðum hennar. Hún skal undirbúa fjárhagsáætlun rafveitunnar í tæka tíð og hafa eftirlit með innheimtu tekna hennar. Rafveitunefnd gerir tillögur til bæjarstjórnar um breytingar á gjaldskrá rafveitunnar, þegar þurfa þykir. Fundarsköp bæjarráðs gilda á fundum nefndarinnar svo sem við á. Rafveitunefnd kýs fundarritara úr hópi nefndarmanna.

#### 31. gr.

Heilbrigðisnefnd skipa þrjú menn. Lögreglustjóri og héraðslæknir eru sjálfkjörnir, en bæjarstjórn kýs einn nefndarmanna úr hópi bæjarfulltrúa og annan til vara.

Lögreglustjóri er lögum samkvæmt formaður nefndarinnar.

Nefndin starfar samkvæmt lögum og heilbrigðissamþykkt kaupstaðarins.

#### 32. gr.

Fræðsluráð skal skipað fimm mönnum og jafnmörgum til vara. Fræðsluráð kýs sér formann og ritara úr hópi fræðsluráðsmanna. Það hefur umsjón og eftirlit með fræðslumálum kaupstaðarins svo sem kveður á um í lögum. Skylt skal fræðsluráði að gera tillögur til bæjarráðs um fjárframlög til skólahalds í tæka tíð fyrir gerð fjárhagsáætlunar.

#### 33. gr.

Framfærslunefnd skipa þrjú menn og jafnmargir til vara. Bæjarstjóri er formaður framfærslunefndar, þótt hann sé ekki kjörinn nefndarmaður. Hún hefur umsjón með framfærslumálum kaupstaðarins, ásamt bæjarstjóra. Fundarsköp bæjarráðs gildi á fundum nefndarinnar, svo sem við á. Framfærslunefnd kýs sér fundarritara úr hópi nefndarmanna. Bæjarstjóri er framfærslufulltrúi nema bæjarstjórn ákveði aðra skipan.

## VI. KAFLI

## Aðrar lögmæltar nefndir.

## 34. gr.

Bæjarstjórn kýs hlutfallskosningu á fundi innan fjögurra vikna frá bæjarstjórnarkosningum eftirtaldr lögmæltar nefndir til 4 ára: Sjúkrasamlagsstjórn, barnavendarnefnd, áfengisvarnarnefnd, náttúruverndarnefnd, sáttanefnd, skólanefnd iðnskóla, millimatsnefnd, og sjó- og verzlunardómsnefnd. Enn fremur kýs bæjarstjórn kjörstjórn til eins árs á fundi í desembermánuði.

## 35. gr.

Stjórn sjúkrasamlags Húsavíkur skipa 5 menn og jafnmargir til vara. Ráðherra skipar formann, en bæjarstjórn kýs fjóra menn og jafnmarga til vara.

Sjúkrasamlagsstjórn hefur með höndum þau mál, er sjúkrasamlagið varðar lögum samkvæmt.

## 36. gr.

Barnaverndarnefnd er skipuð fimm mönnum og jafnmörgum til vara.

Hún kýs sér formann og ritara úr hópi nefndarmanna. Barnaverndarnefnd starfar samkvæmt lögum um barnavernd

## 37. gr.

Áfengisvarnarnefnd skipa sjö menn, þar af kýs bæjarstjórn sex menn og jafnmarga til vara. Ráðherra skipar formann nefndarinnar eftir ábendingu áfengisvarnarráðs. Starfssvið áfengisvarnarnefndar markast af lögum um áfengisvarnir.

## 38. gr.

Náttúruverndarnefnd skipa þrjú menn. Þar af kýs bæjarstjórn tvo menn og jafnmarga til vara, en bæjarfógeti er sjálfkjörinn formaður. Starfssvið nefndarinnar afmarkast af lögum um náttúruvernd.

## 39. gr.

Sáttanefnd skipa tveir menn og jafnmargir til vara.

Starfssvið nefndarinnar afmarkast af lögum.

## 40. gr.

Skólanefnd Iðnskóla Húsavíkur skipa þrjú menn, þar af tveir iðnlærðir menn og jafnmargir til vara, kosnir af bæjarstjórn, en ráðherra skipar formann. Skólanefnd stjórnar iðnskólanum ásamt skólastjóra, samkvæmt lögum og reglum um iðnskóla.

Skólanefnd skal gera tillögur til bæjarráðs um fjárframlög til skólarekstursins í tæka tíð áður en fjárhagsáætlun er samin.

Skyllt er skólanefnd að annast fjárreiður skólans, ef bæjarstjórn óskar þess.

## 41. gr.

Millimatsnefnd skipa tveir menn og kýs bæjarstjórn annan og einn til vara, en ráðherra skipar hinn.

Störf millimatsnefndar fara eftir lögum um fasteignamat.

## 42. gr.

Framtalsnefnd skipa þrjú menn og jafnmargir til vara. Nefndin starfar skv. lögum og reglugerðum um tekjustofna sveitarfélaga.



## 43. gr.

Kjörstjórn skipa þrír menn og jafnmargir til vara. Starfssvið nefndarinnar fer eftir kosningalögum.

## 44. gr.

Sjó- og verzlunardóm Húsavíkur skipa sjö menn og þrír til vara, sem bæjarstjórn tilnefnir alla úr hópi manna, sem hafa þekkingu á sviði siglinga og verzlunar.

## VII. KAFLI

## Bæjarstjóri.

## 45. gr.

Bæjarstjórn ræður bæjarstjóra. Ráðningartími skal að jafnaði vera hinn sami og kjörtími bæjarstjórnar, þó framlengist ráðningartími bæjarstjóra unz bæjarstjórn ræður bæjarstjóra og hann tekur til starfa. Heimilt er að ráða bæjarstjóra til lengri tíma og skal þá hvorum aðila heimilt, að kjörtímabili loknu, að segja upp ráðningarsamningi með sex mánaða fyrirvara. Nú næst ekki meiri hluti í bæjarstjórn fyrir ráðningu bæjarstjóra svo að bæjarstjóri er í andstöðu við meiri hluta bæjarstjórnar og getur þá ráðherra ákveðið, að bæjarstjórnarkosningar skuli fara fram á ný.

## 46. gr.

Bæjarstjóri hefur á hendi framkvæmd ákvarðana þeirra, sem bæjarstjórn gerir og framkvæmd á málefnum kaupstaðarins yfirleitt að því leyti, sem bæjarstjórn hefur ekki ákveðið annað um tiltekin mál.

## 47. gr.

Bæjarstjóri á sæti á fundum bæjarstjórnar, bæjarráðs og nefnda og hefur hann þar sömu réttindi og skyldur, sem bæjarfulltrúar, þar með talin réttur til þóknunar. Ekki hefur hann þó atkvæðisrétt á fundum bæjarstjórnar nema hann sé bæjarfulltrúi og ekki á fundum bæjarráðs og nefnda, nema hann sé lögskipaður eða kjörinn nefndarmaður.

Hann hefur óbundið málfrelsi og tillögurétt á fundum bæjarstjórnar, bæjarráðs og nefnda.

## 48. gr.

Nú samþykkir bæjarstjórn ályktun, er hefur verulegan kostnað í för með sér, sem ekki hefur verið gert ráð fyrir á gildandi fjárhagsáætlun og getur bæjarstjóri þá fellt slíka ályktun úr gildi um sinn og skal þessi ákvörðun hans færð í gerðabókina. Um þetta skal hann svo fljótt, sem verða má senda félagsmálaráðuneytinu skýrslu og leggur það úrskurð á málið. Bæjarstjóri skal senda bæjarstjórninni eftirrit af skýrslunni svo hún geti gert athugasemdir við hana, áður en hún fer til ráðuneytisins. Þá getur bæjarstjóri skotið til fullnaðarákvörðunar bæjarstjórnar ályktunum bæjarráðs.

## 49. gr.

Útgjöld, sem ekki eru lögbundin, samningsbundin eða leiðir af fyrri samþykktum bæjarstjórnar, eða fullnaðarákvörðun bæjarráðs, má ekki greiða nema til komi samþykki bæjarstjórnar. Ekkert gjald má greiða úr bæjarsjóði, nema bæjarstjóri ávísar því til greiðslu.

## 50. gr.

Bæjarstjóra er heimilt að fela öðrum að gegna störfum sínum í forföllum. Stendur sú ákvörðun óhöggud, nema bæjarráð ákveði aðra tilhögun.

## VIII. KAFLI

### Endurskoðun ársreikninga.

#### 51. gr.

Bæjarstjórn kýs tvo endurskoðendur til eins árs í senn og tvo til vara til þess að endurskoða ársreikninga kaupstaðarins og fyrirtækja hans. Kosning skal fara fram á fundi bæjarstjórnar í desembermánuði og kjörtími fylgja reikningsárinu. Bæjarfulltrúar eru ekki kjörgengir til þessara starfa. Um framkvæmd endurskoðunarinnar fer eftir ákvæðum d-liðs III. kafla laga nr. 58 1961 og nánari ákvæðum í reglugerð. Endurskoðendur skulu hafa lokið endurskoðun eigi síðar en 30. júní ár hvert. Bæjarráð getur falið viðurkenndum endurskoðanda að semja ársreikninga kaupstaðarins og fyrirtækja hans, sbr. 25. gr. Jafnframt getur það falið honum að hafa eftirlit með endurskoðun ársreikninga og að gæta þess, að kröfum í lögum og reglum um bókhald og endurskoðun sveitarfélaga sé fullnægt. Senda skal hann bæjarráði skriflega skýrslu um niðurstöður sínar, áður en bæjarráð gerir tillögur um afgreiðslu ársreikninga til bæjarstjórnarinnar.

## IX. KAFLI

### Nefndarkosningar.

#### 52. gr.

Bæjarstjórn kýs fulltrúa í byrjun kjörtímabils vegna aðildar að eftirtöldum samtökum.

- A. Samtök, sem kaupstaðurinn er aðili að heima fyrir:
  1. Fulltrúaráð félagsheimilis Húsavíkur.
  2. Fulltrúaráð Sjúkrahúss Húsavíkur.
  3. Stjórn Bókasafns Suður-Þingeyinga.
  4. Stjórn Héraðsskjalasafns Suður-Þingeyinga.
- B. Félagssamtök sveitarfélaga:
  1. Landsfundur Sambands ísl. sveitarfélaga.
  2. Aðalfundur Brunabótafélags Íslands.
  3. Fjórðungsþing Norðlendinga.
  4. Fulltrúafundur kaupstaða á Vestur-, Norður- og Austurlandi.

Samþykktir samtakanna kveði á um réttinn til fulltrúakjörsins.

#### 53. gr.

Bæjarstjórn kýs eftirtaldar nefndir og starfsmenn til eins árs:

- A. Á fundi í desembermánuði skulu kosnir:
  1. Fimm menn í hátiðanefnd 17. júní.
- B. Á fundi í júnímánuði skulu kosnir:
  1. Einn maður samkvæmt tilnefningu Íþróttafélagsins Völsungur, sem vera skal, ásamt íþróttakennurum skólanna og forstöðumanni sundlaugar, bæjarráði til ráðuneytis um málefni Sundlaugar Húsavíkur.
  2. Tveir menn og jafnmargir til vara úr hópi sauðfjáreigenda, sem eru ásamt fjallskilastjóra bæjarráði til ráðuneytis um landbúnaðarmál.
  3. Tveir menn, sem eru ásamt slökkviliðsstjóra, bæjarráði til ráðuneytis um brunavarnamál.
  4. Fjórir menn og jafnmargir til vara, ásamt bæjarstjóra, í hitaveitunefnd. Bæjarstjóri er formaður nefndarinnar.

## 54. gr.

Bæjarstjórn kýs einn eða tvo menn í stjórnir sparisjóða í Húsavík, svo og endurskoðendur, eftir því sem samþykkt hvers sjóðs segir til um.

## 55. gr.

Um skipan nefnda, valdsvið þeirra og verksvið fer eftir því, sem ákveðið er í lögum eða samþykkt kaupstaðarins. Þar sem ekki er um slíkar reglur að ræða, getur bæjarstjórn sett þær. Ekki má framselja slíkri nefnd vald, sem bæjarstjórn er fengið með lögum. Þegar kjörtími nefndar er óákveðinn, skal litið svo á, að umboð nefndarmanna falli niður, þegar kjörtími bæjarstjórnar er á enda, nema um sé að ræða nefnd, sem fengið hefur til úrslausnar ákveðið og afmarkað verkefni, þá skal litið svo á, að starfi hennar ljúki fyrst, er verkefnið er til lykta leitt.

## X. KAFLI

## Starfsmenn kaupstaðarins.

## 56. gr.

Bæjarráð ræður fasta starfsmenn kaupstaðarins og veitir þeim lausn eftir því, sem nánar segir í samþykkt þessari, nema vald til slíks sé að lögum fengið öðrum aðilum eða á annan veg mælt fyrir í reglugerðum um sérmál tiltekinna stofnana. Bæjarráð ákveður hvort auglýsa skuli til umsóknar stöður hjá kaupstaðnum og fyrirtækjum hans, en bæjarstjóri ákveður í samræði við bæjarráð, hvernig auglýsa skuli. Bæjarráð getur ákveðið, hver almenn skilyrði skuli gilda um ráðningu í föst störf svo og sérskilyrði, er gilda skuli um ákveðin störf. Bæjarráð getur sett starfsmönnum erindisbréf og kveðið þar á um starfssvið þeirra. Skylt er starfsmönnum að hlíta breytingum á starfssviði sínu, enda missi þeir einskis af launum sínum við þá breytingu.

## 57. gr.

Bæjarstjórn ákveður með sérstökum samþykktum, hver störf skuli talin föst hjá kaupstaðnum og fyrirtækjum hans, auk þeirra starfa, sem skv. lögum og reglugerðum eru talin föst störf.

## 58. gr.

Nú verður gerður samningur milli bæjarstarfsmanna eða samtaka þeirra annars vegar og kaupstaðarins eða samtaka sveitarfélaga hins vegar um kaup og kjör, og skulu þá kjör fastra starfsmanna kaupstaðarins fylgja þeim kjarasamningi, svo sem við á, þó er óheimilt að rýra kjör starfsmanns til samræmis við samninginn.

## 59. gr.

Fastir starfsmenn kaupstaðarins og fyrirtækja hans njóta sömu réttinda um orlof og veikindadaga og opinberir starfsmenn, unz gerður er samningur sá, er um getur í 58. gr. Uppsagnarfrestur fastra starfsmanna skal vera þrjú mánuðir.

## 60. gr.

Með gildistöku þessarar samþykktar falla úr gildi ákvæði um vatnsveitunefnd í reglugerð Vatnsveitu Húsavíkur svo og ákvæði í reglugerð um holræsi í Húsavík og eru bæjarráði falin störf nefndarinnar.

## Ákvæði til bráðabirgða.

Kjör framtalsnefndar fyrir núverandi kjörtímabil skal fara fram á fundi bæjarstjórnar í desember 1962.

Kosningum skv. 52. gr. og kosningu endurskoðenda bæjarsjóðs og fyrirtækja bæjarins fyrir reikningsárið 1962, skal lokið í tæka tíð á árinu 1962.

Kosningar skv. B-lið 53. gr. skulu fara fram í fyrsta sinn á fundi bæjarstjórnar í október 1962.

Samþykkt þessi, sem bæjarstjórn Húsavíkurkaupstaðar hefur samið og samþykkt, staðfestist hér með samkvæmt lögum nr. 58 29. marz 1961, til þess að öðlast gildi þegar í stað, og birtist til eftirbreytni öllum þeim, sem hlut eiga að máli.

Jafnframt er úr gildi numin samþykkt um stjórn bæjarmálefna Húsavíkurkaupstaðar nr. 216 11. október 1950.

*Félagsmálaráðuneytið, 1. október 1962.*

F. h. r.

**Hjálmar Vilhjálmsson.**

*Hallgrímur Dalberg.*

## G J A L D S K R Á

fyrir Hitaveitu Reykjavíkur.

### I. KAFLI

#### 1. gr.

Hitaveitan selur afnot af heitu vatni úr veitukerfum þeim, sem gerð hafa verið eða verða gerð, eftir þeim reglum, sem settar eru í gjaldskrá þessari.

#### 2. gr.

Hitaveitan lætur hverju húsi, sem er í sambandi við vatnsæðar hennar, í té vatnsmagn, er ætla má að nægi til fullrar hitunar á húsinu, enda séu ofnar hússins nægilega stórir, að dómi Hitaveitunnar.

Verður vatnsrennsli að húsinu takmarkað um hemil, eftir því sem þörf krefur.

#### 3. gr.

Fyrir afnot heita vatnsins skal greiða samkvæmt vatnsmæli kr. 4.77 fyrir hvern rúmmetra vatns. Þar til vatnsmælir hefur verið settur upp, og ef vatnsmælir bilar, áætlar Hitaveitan vatnsnotkunina með hliðsjón af hitaþörf hússins.

#### 4. gr.

Hitaveitan leigir vatnsmæla og annast viðhald þeirra. Leigan fyrir mæla skal greidd jafnhliða gjaldi fyrir vatnsnotkun og skal vera fyrir hvern mæli á mánuði:

a. Fyrir mæla allt að $\frac{3}{4}$ " .....	kr. 30.00
b. Fyrir mæla allt að 1—2" .....	— 75.00
c. Fyrir mæla allt að 3" .....	— 270.00

#### 5. gr.

Hitaveitugjöld skv. 3. og 4. gr. verða krafín mánaðarlega, þegar eftir mælistur.